

Акафист
святителю Василию Великому,
архиепископу Кесарии Каппадокийской

Празднование 14 (1) января, 12 февраля (30 января)

Кондак 1

Взбранный Царя Небеснаго служителю и великий Церкви Христовы святителю, правыя веры исповеданием во всем мире просиявый, велие имея дерзновение ко Святей Троице, от всяких нас бед ограждай, со умилением тебе вопиющих:

Радуйся, Василие, великий иерарше, Православия всемирный светильниче.

Икос 1

Ангелов Творец, от века предызбравый тя, преблаженне отче Василие, быти великаго светильника Церкви Своея, ангелоподобна житием яви тя: вельми бо богомыслием и пощеньми в пустыни подвизався, на высоту добродетели восшел еси. Темже, велию на небесех славу стяжавый, прими от нас смиренных, восхваляти тя дерзающих, сия хвалебныя глаголы:

Радуйся, Василие, царствия тезоименитый; радуйся, иерарше Христов великий. Радуйся, Церкви непоколебимый столпе; радуйся, рода святаго пречестная отрасле. Радуйся, от юности Царю Небесному всеусердно служивый; радуйся, всею землею, наипаче же небесною премудростию ум свой обогативый. Радуйся, купно со другом твоим Григорием Богословом в любомудрии преуспевавый;

радуйся, учителя твоего Еввула премудрыми словесы ко Христу обративый. Радуйся, чистоты и целомудрия предивный хранителю; радуйся, ко спасению верный путеводителю. Радуйся, душепагубных ересей разорителю; радуйся, богомудрый вселенная учителю.

Радуйся, Василие, великий иерарше, Православия всемирный светильниче.

Кондак 2

Видя Церковь Христову арианским зловерием обуреваему, и Божию призыванию повинуюся, изшел еси, преподобне отче, из пустыни, юже возлюбил еси, во град Кесарию, идеже благодать священства восприял еси и во архиепископа поставлен был еси, слово спасения велегласно всем концем земли благовествуя, верная же по вся дни поучая Богу, Создателю всех, достойно воспевати: Аллилуиа.

Икос 2

Разум верных боговедением просвещая, святителю Христов Василие, естество сущих изъяснил еси, и Бога невидимаго в творениях руку Его познавати научил еси. Темже и мы, твоими богомудрыми ученьми просвещаемии, взываем сице:

Радуйся, познанием Бога, в шесть дней вся сотворша, верная озаривый; радуйся, дивныя дела Его достойно восхваляти научивый. Радуйся, палато мудрости преукрашенная; радуйся, сокровищница богословия преизобильная. Радуйся, яко тайны премудрости Божия во всем мире видети научал еси; радуйся, яко и в малых вещех величие Божие зрети

наставлял еси. Радуйся, света первожданнаго красоту живописавый; радуйся, твердую силу перваго глагола Божия во вселенной показавый. Радуйся, былием травным скорую гибель славы земныя изобразивый; радуйся, во благолепии светил небесных Солнце Правды Христа зрети указавый. Радуйся, трудолюбием малой твари от лености людей отвращавый; радуйся, человеку, царю тварей, над страстьми царствовать повелевавый.

Радуйся, Василие, великий иерарше, Православия всемирный светильниче.

Кондак 3

Силою Всевышняго укрепляем, отче святой Василие, противоборствовал еси богоотступнику Иулиану, и злое его на христианы умышление разрушити умолил еси Господа и Пречистую Его Матерь, да вси Единому Богу благодарно поют: Аллилуиа.

Икос 3

Имеяй ревность велию по Бозе Вседержителе и меч слова Его в руке восприим, плевелы языческаго Иулианова нечестия скоро посекал еси, верныя же во благочестии утвердил еси; научи и нас, преподобне отче, единому точию Богу чистым житием служити, зовущих ти сице:

Радуйся, гордаго Иулиана в богоотступстве мужественно обличивый; радуйся, христоненавистныя его начинания разрушивый. Радуйся, молитвою слезною, яко копием, того поразивый; радуйся, скорую его погибель

предвозвестивый. Радуйся, люди Божия, якоже Моисей древле Израиля, от идолослужения свободивый; радуйся, плевелы нечестия истребивый. Радуйся, пищею словес Божиих верныя изобильно насытивый; радуйся, струями благодати сердца напоивый. Радуйся, скрижали велений Христовых твердо содержати увещевавый; радуйся, учение уст твоих житием утвердивый. Радуйся, рабе благий и верный; радуйся, делателю вертограда Христова усердный.

Радуйся, Василие, великий иерарше, Православия всемирный светильниче.

Кондак 4

Бурю ярости царя Уалента, арианским зловерием одержима, ты, святче Божий, силою Духа в тебе живуща, утишил еси, и мир Церкви Святей даровал еси, святыми трудами твоими и теплыми к Богу молитвами, Ему же радуясь воспел еси: Аллилуиа.

Икос 4

Слышав злочестивый Уалент, яко ты, иерарше Божий, во истине стоиши, и вси вернии гласу твоему повинуются, восхоте от правыя веры тя отвратити; сего ради посла к тебе епарха своего Модеста, послежде же и сам прииде в Кесарию. Но ты, богоносе отче, ни гнева царева, ни прошений грозного его воеводы не устрашился еси; мы же, прославляюще сицевое твое твердое исповедание, вопием ти:

Радуйся, поборниче правыя веры непоколебимый; радуйся, пастырю, душу за верныя положити готовый. Радуйся, твердое исповедание Петрово

показавый; радуйся, Илиину ревность о славе Святыя Троицы явивый. Радуйся, гнев царя нечестиваго боголепием священнослужения утишивый; радуйся, богомудрыми словесы уста зловернаго воеводы заградивый. Радуйся, яко прещения изгнанием и муками не убоялся еси; радуйся, яко и смерть за Христа восприяти желал еси. Радуйся, гонение за веру претерпевый; радуйся, скорбьми многими в радость Господа вшедый. Радуйся, истину Христову пред цари и владыки небоязненно вещавый; радуйся, вернаго служителя Царя Небеснаго твердым исповеданием себе показавый.

Радуйся, Василие, великий иерарше, Православия всемирный светильниче.

Кондак 5

Боготечная звезда явился еси, святителю Христов Василие, пресветлыми милосердия лучами нощь скорбей мрачную осиявающая, мглу бед отгоняющая, и всем, в море жития бурном плывущим, путь верный к Царству Небесному показующая, да вси спасающему Богу радующеся поют: Аллилуиа.

Икос 5

Видевше вси тя, святителю Божий, яко отца чадолюбива, в напастех и скорбех от тебе помощи усердно искаху: ты же о всех милосердовал еси, образ веры истинныя в себе сим показуя. Буди, преблагий отче, скорый помощник и нам, грехми и скорбьми обуреваемым, с любовию ти вопиющим:

Радуйся, светильниче любве, от Христа возсиявый; радуйся, Отцу Небесному в милосердии подражавый.

Радуйся, неимущих богатое сокровище; радуйся, в нуждах верное прибежище. Радуйся, гладныя, якоже Иосиф древле, препитавый; радуйся, многи обители бездомным и убогим в Кесарии основавый. Радуйся, прокаженных раны своима рукама, яко самарянин добрый, врачевавый; радуйся, гонителя твоего Модеста недугующа исцеливый и от народныя казни того избавивый. Радуйся, вдовицу убогую от обиды епарха защитивый; радуйся, жене грешнице прощение грехов у Бога испросивый. Радуйся, сирот отче и страждущих утешение; радуйся, во гресех погибающих вразумление и исправление.

Радуйся, Василие, великий иерарше, Православия всемирный светильниче.

Кондак 6

Проповедник всему миру истины Христовы явился еси, святителю отче Василие, силою благодатною слова твоего, яко острием меча, греховная сердца проницаяй и к покаянию возбуждаяй, да вси чистым сердцем Троице Святей поют: Аллилуиа.

Икос 6

Возсиял еси на тверди церковной, яко великое светозарное светило, отче Василие, всю поднебесную разумением веры истинныя просвещающее, мрак же страстей греховных отгоняющее, от нихже и нас свободи, зовущих ти сице:

Радуйся, Троицы Святыя верный служителю; радуйся, тайн веры богоозаренный изъяснителю. Радуйся, яко Отцу Сына Единосущна и Духа Сопрестольна велегласно проповедал еси; радуйся,

яко истину о Свете Превечном, от Света Превечна просиявшем, верным изъяснил еси. Радуйся, Господа Спасителя, яко Бога воплощенна и Творца всех век исповедавый; радуйся, таинство двух естеств и единой ипостаси во Христе Бозе показавый. Радуйся, силою царственного слова твоего богатым житницы открыти повелевый; радуйся, от корысти неправедныя многи учением отвративый. Радуйся, душепагубное пьянство словом, яко громом, поражавый; радуйся, жестокосердие и зависть из сердец истреблявый. Радуйся, воздержания ревнительный наставниче; радуйся, покаяния неумолчный проповедниче.

Радуйся, Василие, великий иерарше, Православия всемирный светильниче.

Кондак 7

Хотя верныя от соборищ арианских оградити, ты, святче Божий Василие, вся в церкви благоукрасил еси, и чин умилительный Божественныя Литургии мудре сложил еси, многи же молитвы, яко миро благовонное, от уст твоих огнедохновенных излишася, имиже во гресех прощения себе и усопшим братиям просим, Троицу же Пресвятую славим, поюще: Аллилуиа.

Икос 7

Новаго Аарона вернии зряху в тебе, отче святыи Василие, егда боголепно жертву безкровну священнодействовал еси, дарования Святаго Духа, яко многоценными каменьями светящеюся одеждою, украшен. Ныне же в вышнем жертвеннице о Церкви

предстательствуяй, поминай выну и нас, тебе умиленно зовущих:

Радуйся, архиерею Божий, преизобильную, якоже и Аарон, благодать священства восприявый; радуйся, велие дерзновение в молитве за люди стяжавый. Радуйся, тайн Божиих мудрый строителю; радуйся, чина церковнаго благоукрасителю. Радуйся, служению Литургии от самага Христа, якоже и Иаков апостол, наученный; радуйся, молитвенниче, Духом Божиим озаренный. Радуйся, небесным светом, якоже неции видеша, в служении осияваемый; радуйся, ангелы, яко некими пресветлыми мужами, окружаемый. Радуйся, яко твоею первее молитвою к восприятию Тайн Христовых себе уготовляем; радуйся, яко твоими словесы в вечер Пятидесятницы коленопоклонная прошения возсылаем. Радуйся, Кесарийскаго святительскаго престола славо и украшение; радуйся, яко иереом всея Церкви подаеши от Бога благодатное в служении укрепление.

Радуйся, Василие, великий иерарше, Православия всемирный светильниче.

Кондак 8

Странное и преславное видение открыся о тебе, святителю Василие, преподобному Ефрему Сирианину: единожды бо показа ему тя Бог, яко столпа огненна, высоты небесныя досязающа, послежде же, пришед в Кесарию, преподобный узре тя огненным языком люди поучающа и умиленно возопи Богу: Аллилуиа.

Икос 8

Весь светом небесным серафимския любви пламенел еси, богоносе Василие; слова бо твоя беша, яко молния, ереси поपालющая, души же верных пламенем веры и любви просвещающая; даждь убо и нам, отче, молитвою твоею, искру хотя малую твоя любви имети, зовущим сицевая:

Радуйся, пламеновидный столпе, ереси поपालяй; радуйся, огонь веры истинный и любви нелицемерный возгреваяй. Радуйся, лжи Ариевы ереси твердый обличителю; радуйся, истины Христовы пламенный ревнителю. Радуйся, яко гордаго Евномия, Сына Божия хуливша, посрамил еси; радуйся, яко Македониево хуление Духа Святаго препрел еси. Радуйся, суемудрия Несториева разорителю; радуйся, чести Пресвятыя Богоматере усердный защитителю. Радуйся, пастырю, небесным блистанием любви осияваемый; радуйся, учителю веры, слова молниеносная вещавый. Радуйся, богонасажденная маслино, многих святых Церкви произведшая; радуйся, лозо, богомудрых православия поборников израдившая.

Радуйся, Василие, великий иерарше, Православия всемирный светильниче.

Кондак 9

Все еретическое соборище не возможе противостояти благодатней, яже в тебе, святой отче, обиташе, силе; юношу бо некоего, во власть сатаны впадша, силою молитвы твоя от сетей вражиих отъял еси, покаившася же ко Христу возвратил еси, благодарно

помя Спасителю Богу: Аллилуиа.

Икос 9

Витийством Богодухновенным твоим, святителю Василие, побеждаемии и видевшие преславное на юноше бывшее чудо, мнози от еретик ко единой присоединишася Церкви, еяже верными и послушными чадами и нас быти сподоби, зовущих ти сице:

Радуйся, вся концы земли небесным учением осиявый; радуйся, благодатию Христовою темныя силы ада побеждавый. Радуйся, юношу от сетей сатаны свободивый; радуйся, телом и кровию Христовою того насытивый. Радуйся, яко душе, кровию Христовою искупленной, погибнути не дал еси; радуйся, яко, в погибельный грех впадша, юношу простити Христа умолил еси. Радуйся, яко преславным чудом люди удивил еси; радуйся, яко обращением заблудша ангелы возрадовал еси. Радуйся, просити у Господа ангелов ограждения нас научаяй; радуйся, ангела хранителя молитвою твоею к нам приближаяй. Радуйся, от наветов вражиих свободителю; радуйся, во искушениях скорый защитителю.

Радуйся, Василие, великий иерарше, Православия всемирный светильниче.

Кондак 10

Спасти хотя Творец Свое словесное создание, показав твоя твердаго верных защитителя, отче Василие, и Церкви Своея хранителя, да свет православия тобою всему миру явлен будет, и вси вернии благодарно

Троице Святей воспевают: Аллилуиа.

Икос 10

Стена еси Церкве, и твердое верных ограждение явился еси, о великий в иерарсех Василие, егда во граде Никейстем врата церковная силою молитвы твоя отверзл еси и истину правыя веры сим явил еси, уста же хулящих Имя Христово заградил еси. Нам же, Господа Спасителя православно исповедающим, отверзи, отче, милосердия Божия двери, заступлением твоим, да зовем ти сице:

Радуйся, ангеле земный, Церкве Христовы хранителю; радуйся, Богом предъизбранный верных защитителю. Радуйся, врата церковная, якоже Илиа древле небо, молитвою открывый; радуйся, храм святой, еретиками восхищенный, паки верным возвративый. Радуйся, верных от ересей оградивый; радуйся, Церковь Христову неврежденну от лжеучений сохранивый. Радуйся, превеликое на небеси Имя Христово и на земли чудесы возвеличивый; радуйся, православие во вселенней утвердивый. Радуйся, яко тобою гордость нечестивых низложися; радуйся, яко тобою смирение верных вознесся. Радуйся, яко тобою вера святая прославляется; радуйся, яко тобою Церковь Христова дивно красуется.

Радуйся, Василие, великий иерарше, Православия всемирный светильниче.

Кондак 11

Пение подобаше возносимо быти тебе с небеси, а не от земли, о пречудный Василие, небес бо явление на

земли был еси, к небеси богомудрыми ученьми твоими умы верных возводил еси, и ныне с небес на ны милостиво призираеши и преизобильную всем нам благодать подаеши от щедродателя Христа Бога, Емуже со ангелы в небесех выну поеши: Аллилуиа.

Икос 11

Светоносный светильниче, весь многими дарами Божиими и добродетельми сияющ, был еси, святче Божий Василие, имиже и ны просвети, в добродетели настави и ко Царствию Небесному направи, зовущих тебе сице:

Радуйся, Церкви Христовы незаходимое сияние и пресветлое украшение; радуйся, яко подаеши христианом во вся веки в вере правей утверждение. Радуйся, таланты, Богом врученныя тебе, усовершенствовав; радуйся, от земных мудрости вся ко спасению полезная собравый. Радуйся, сыну цареву во славу правоверия чудесное исцеление даровавый; радуйся, целомудренное житие Анастасия пресвитера и супружницы его прозревый. Радуйся, кротко обидящим тя прощавый; радуйся, смирением и терпением клеветы на тя побеждавый. Радуйся, устав совершеннаго жития иноком учредивый; радуйся, многи иноки в обителях собравый. Радуйся, правила и каноны и спасительная учения в наследие Церкви оставивый; радуйся, богомудрыми списаньми твоими многоценное сокровище к назиданию христианом даровавый.

Радуйся, Василие, великий иерарше, Православия всемирный светильниче.

Кондак 12

Благодать велию дарова тебе Христос Бог, святителю отче Василие, не точию заблуждшия к покаянию приводити, но и многи неверныя ко Христу обращати; егда бо уже смертно болезновал еси, ко блаженней кончине приближаяся, евреанина врача, с женою и чады, Святым Крещением просветил еси и Троице Святей купно с ними благодарственную воспел еси песнь: Аллилуиа.

Икос 12

Поют ти велия похвалы вси вернии, о великий иерарше Василие, вельми бо на земли до конца жития твоего во славу правоверия потрудився, в Небесная Свята Святых вшел еси, и яко верный Божий служитель, Троице Святей предстал еси, идеже и о нас выну молися, о преблагий отче, верою чадах твоих, с любовию зовущих ти сице:

Радуйся, царское священство, прехвальное Василие; радуйся, Троицы Святыя преукрашенное селение. Радуйся, чудесными деяньми Царя Небеснаго прославивый; радуйся, ревности своея о славе веры и в болезни смертней не оставивый. Радуйся, ради обращения неверна чудесное продление себе жития у Бога испросивый; радуйся, своима рукама, возстав с одра смертнаго, крещением того просветивый. Радуйся, трудами и мудростию силу зловерия победивый; радуйся, благоверным царем победы на враги испросивый. Радуйся, апостолом в трудех единоправный; радуйся, со святители Григорием Богословом и Иоанном Златоустом, по повелению

твоему, единочестно прославляемый. Радуйся, нетлением мощей просиявый и славою на небесех увенчанный; радуйся, теплый и великий заступниче, от Бога нам дарованный.

Радуйся, Василие, великий иерарше, Православия всемирный светильниче.

Кондак 13

О пресвятый и великий иерарше Христов Василие, Православия светило и верных ограждение! Призри с небесе на сие, приносимое ти нами, хваление и молитвами твоими от страстей и бед нас огради, в правей вере соблюди и Царствия Небеснаго сподоби, да купно с тобою и всеми святыми Троице Святей во веки веков поем: Аллилуиа.

(Этот кондак читается трижды, затем икос 1-й и кондак 1-й)

Икос 1

Ангелов Творец, от века предызбранный ты, преблаженне отче Василие, быти великаго светильника Церкви Своея, ангелоподобна житием яви ты: вельми бо богомыслием и пощеньми в пустыни подвизався, на высоту добродетели восшел еси. Темже, велию на небесех славу стяжавый, прими от нас смиренных, восхваляти ты дерзающих, сия хвалебныя глаголы:

Радуйся, Василие, царствия тезоименный; радуйся, иерарше Христов великий. Радуйся, Церкви непоколебимый столпе; радуйся, рода святого пречестная отрасле. Радуйся, от юности Царю Небесному всеусердно служивый; радуйся, всею земною, наипаче же небесною премудростию ум свой

обогащивый. Радуйся, купно со другом твоим Григорием Богословом в любомудрии преуспевавший; радуйся, учителя твоего Еввула премудрыми словесы ко Христу обративый. Радуйся, чистоты и целомудрия предивный хранителю; радуйся, ко спасению верный путеводителю. Радуйся, душепагубных ересей разорителю; радуйся, богомудрый вселенная учителю.

Радуйся, Василие, великий иерарше, Православия всемирный светильниче.

Кондак 1

Взбранный Царя Небеснаго служителю и великий Церкви Христовы святителю, правая веры исповеданием во всем мире просиявший, велие имея дерзновение ко Святей Троице, от всяких нас бед ограждай, со умилением тебе вопиющих:

Радуйся, Василие, великий иерарше, Православия всемирный светильниче.

Молитва первая

О великий во иерарсах, вселенная учителю богомудрый, преблаженне отче Василие! Велия подвиги и труды твоя, яже во славу Святыя Церкви совершил еси: ты исповедник твердый и светильник веры Христовы на земли был еси, светом боговедения верная озаряя, ложная учения попяляя, и всему миру слово спасительная истины возвещая. Ныне же, велие на небесех имея дерзновение ко Святей Троице, помози нам, со смирением к тебе припадающим, твердо и неизменно святую православную веру до конца жития нашего

сохранити, от маловерия же, сомнений и колебания в вере соблюди, да не прельщени будем богопротивных и душепагубных учений словесами. Дух ревности святыя, еуже ты пламенел еси, о преславный Церкви Христовы пастырю, возгрей предстательством твоим и в нас, ихже Христос постави быти пастырями, да всеусердно просвещаем и утверждаем в правей вере словесное стадо Христово. Испроси, о милосердый святителю, от Отца светов и всем, всякий дар коемуждо благопотребен: младенцем благое в страхе Божиим возрастание, юным целомудрие, старым и немощным укрепление, скорбящим утешение, недугующим исцеление, заблуждшим вразумление и исправление, обидимым заступление, сиротам и вдовицам защищение, искушаемым благодатное поможение, отшедшим от сего временнаго жития, отцем и братьям нашим блаженное упокоение. Ей, святче Божий, призри милостиво от обителей горних на нас смиренных, многими соблазнами и напастями обуреваемых, и с земли приверженных возведи к высоте небесней. Преподаждь нам, преблагий отче, твое архипастырское и святое благословение, да оным осеняемии, в сие новое лето и во все прочее время живота нашего в мире, покаянии и послушании Святей Православней Церкви поживем, заповеди Христовы усердно творяще, подвигом добрым веры подвизающесе, и тако Царствия Небеснаго достигнем, идеже с тобою и всеми святыми сподоби Троицу Святую, Единосущную и Нераздельную, пети и славити во веки веков. Аминь.

Молитва вторая

О великий и пресвятой святителю отче Василие, преславный Вселенския Церкви учителю, славы Пресвятыя Троицы всеусердный поборниче, Матере Божия и Ея пренепорочнаго девства предызбранный исповедниче, пресветлый чистоты, смирения и терпения образе. Се аз многогрешный и недостойный на высоту небесную взирати, смиренно молю тя, о премудрый Церкви Христовы учителю, научи мя тако богобоязненно житие свое проводить, да никогда же на путь, Божиим повелением противен, уклонюся или совращен буду. Соблюди и избави мя твоим многомошным предстательством от соблазнов мира и козней диавольских, якоже избавил еси от них юношу, от Сладчайшаго Спасителя нашего отступивша и во власть сатаны впадша. Даруй мне силу душевную усердным быти подражателем добродетелей твоих высоких: соделай мя в вере правей тверда и непоколебима, укрепи мя малодушнаго в терпении и уповании на Господа, возгрей в сердце моем истинную Христову любовь, да небесных благ паче всех желаю и ими услаждаюся. Испроси мне у Господа искреннее о гресех сокрушение, да прочее время живота моего в мире, покаянии и исполнении заповедей Христовых провождати буду. Егда же час моего скончания приблизится, ты, о преблагий отче, с Преблагословенною Девею Мариєю, тогда ускори на помощь, защити мя от злобных наветов вражиих, и сподоби мя наследника быти райских селений, да купно с тобою и со всеми святыми неприступнаго

Божия величества Престолу предстану и Живоначальную, Единосущную же и Нераздельную Троицу прославляю и воспеваю, присно и в безконечныя веки. Аминь.

Молитва третья

О великий и преславный святителю Христов, всея Вселенския Церкви учителю богомудрый, Православия твердый исповедниче и поборниче, всеблаженне отче Василие! Призри от высот небесных на нас, смиренно к тебе припадающих, и умоли Господа Вседержителя, Егоже верный на земли служитель был еси, да дарует нам веры правыя твердое и неизменное сохранение, Церкви Святей послушание, жития нашего исправление, и во всех нуждах, скорбех и искушениях скорое поможение, терпение же и укрепление. Подаждь нам твое святое благословение, да оным осеняемии, сие новое лето и во вся дни богоугодно в мире и покаянии проживем и во Царствии Небеснем сподобимся купно с тобою и со всеми святыми Живоначальную Троицу воспевати и славити, Отца и Сына и Святаго Духа, во веки веков. Аминь.